

■ OR DA LA VITA DA LUDMILLA CAHENZLI

Ils Cahenzlis maridan muslims e muslimas

Dapi emnas èsi la medema taltiala durant tschaina. Suenther ch'ìls dus fragliuns gronds han tragutti duas pitschuttas, vai liber. La gronda ed il mesaun sa stgaudan pervi da muslims, minarets e fazolets. La pitschna less era dir insatge, ma ella n'ha nagina schanza da vegnir en cun il pled. Nus geniturs, Ludmilla ed Eugen Cahenzli, laschain discutar ils giuvens, lain esser tolerants e moderns.

Avant la votaziun è la discussiun ida tenor il suandant muster: Il mesaun dumbra si ils menders machos dal vitg che partan gugent ora fridas. Seppi e Luca, ils dus Svizzers, lascha el sa chapescha davent e menziuna sulet Arment, Mensur e Mustafa. «Per da quels na stuain nus segir betg bajegiar minarets en Svizra.» Che Mensur ha ragischs serbas ed è in cristian e che Arment è in Alevit che na dovra ni moscheas ni minarets, na disturba insumma betg il mesaun.

La figlia gronda è d'in auter avis. «La Niruba, l'Isalia e la Bahrija tutgan tar mias meglras amias. Ellas èn fitg flottas e sa deportan sco nus Svizzers.»

«La Niruba n'è nagina muslima, mabain ina Tamila, precise-scha il mesaun»: «Ella è schon endretg, ma las muslimas cun questas burcas ed ils fazolets da chau n'han pers nagut en Svizra.»

«Cura has ti pia vesì ina dunna cun burca en noss vitg? Ti es in rassist primitiv!»

Avant la votaziun ha la gronda gi' surmaun en ils cumbats rectorics, ma dapi la dumengia da votaziun èsi auter. «Igl è ina vargugna da viver en quest pajais», di la gronda mintg'otra saira. Ella è londervi da zambergiar giun tschaler in minaret. Quel less ella tschentar si sco decoraenziun da Nadal – illuminà cun ina massa stailas e glinas. Ma ella ha bravamain retard, uschia ch'il minaret è forsa pront sin Pasca. En mintga cas na sa lascha il figl betg pli titular sco rassist primitiv da sia sora. «Èn 57 per tschient dals Svizzers forsa rassistis primitivs?» di el, sch'ella flippescha puspè ina giada or: «Uss stos dar tiers ch'jau hai gi' raschun. Muslims na tutgan betg tar nus en Svizra. Quels duain ir a chasa, sch'i vulan crair vi da l'islam.»

«E tge fas, sch'jau marid in muslim?»

Quatter chaus sa volvan vers il chantun da la maisa, ord il qual ins n'auda uschiglio mai in'entira construcziun. La sora pitschna guarda a ses frar agraden e surri. Lez na sa betg tge dir.

«Sch'jau marid in muslim, lura has ti in quinà muslim e ti stos far padrin d'uffants muslims, constatescha la pitschna.»

L'emprima che vegn da reagir

sin quest patratg è la gronda cun la bucca largia. «Classa, jau marid er in muslim e lu has la merda», di ella al frar.

«Lura stuais vus trair en fazolets ed ir a spass dus pass davos voss umens, dat el enavos: Quai faschess bain a vus duas.»

«Na, nus maridain muslims moderns. Ti savessas gea era maridar ina muslima, fora la gronda.»

«O gea», sa maschaida mes Eugen l'emprima giada en la discussiun: «Questas dunnas muslimas dals pajais arabs èn bellezza dunnas, sch'ellas prendan giu il fazolet da chau. Quai fiss schon anc insatge per tai.» Eugen tschegna cun in egl en direcziun da ses figl.

Jau, Ludmilla Cahenzli, guard cun bucca e nas sin mes Eugen. Danunder sa quel tuttenina, co che dunnas arabas vesan or, sch'ellas prendan giu il fazolet da chau? Lura guard jau sin mes trais uffants ch'èn anc adina londervi da termagliar cun patratgs da maridar muslims e muslimas. Jau ma ves gia en diesch onns sco tatta, circumdada da pitschens biadis e pitschnas biadias – bellezza uffants senza u cun fazolets. E per in batterdegl sa schluita ina dumonda maligna atras mes chau. Sa sch'jau avess forsa tuttina duì votar cunter ils minarets?

Ludmilla Cahenzli